

丁文誠公奏稿

丁文誠公奏稿

卷之二十五目錄

遵議安置軍流徒犯摺

光緒十年十一月初七日

慶典議敘謝

恩摺

光緒十年十二月初二日

行黔鹽釐請仍由川征解摺

光緒十年十二月十六日

歲協黔饟請仍由川撥解摺

光緒十一年正月初七日

降級留任謝

恩摺

光緒十一年正月二十七日

京察議敘謝

恩摺

光緒十一年三月初五日

懇 准乍了入

貢片

同日

英人窺伺後藏豫爲籌備片

光緒十一年四月初三日

越嶲廳添設學額並廩增額數摺

光緒十一年五月初四日

長子體常

簡河東道謝

恩摺

光緒十一年五月初四日

議覆戶部開源節流各條摺

光緒十一年六月初二日

查明川庫收支數目摺

光緒十一年六月十六日

明儒來知德請從祀兩廡摺

光緒十一年七月初四日

遵議安置軍流徒犯摺

光緒十年十一月初七日

奏爲遵照查明川省地方安置軍流徒犯籌議情形恭摺
覆陳仰祈

聖鑒事竊臣於光緒九年十二月初七日准刑部咨以各
省軍流徒犯脫逃日眾亟應變通整頓請

旨飭下各省體察地形妥議安置以維法紀一摺光緒九
年十月三十日具奏本日奉

旨依議欽此欽遵咨行到臣當經飭司核議去後茲據按
察使如山具詳前來臣覆加考核伏維立法貴探其本意
王道不外乎人情五刑之中設有徒流而徒流之外加以
軍遣所以權衡於出死入生之際以廣其悔罪遷善之途

法至善意至良也迄今奉行日久本意浸失軍流徒犯既無差役以拘其身又無月糧以餬其口安置未有良法主守徒存虛名此種罪犯大率素不安分竊盜之徒尤多處此餒凍交加欲其循循法守勢有不能誠如刑部所云有不能不逃之勢更有可以脫逃之機洵爲至論今求變通之法加逃人之罪名彼實迫於難已嚴主守之條律犯本散而難稽若云錄長授食其守法者固能自謀生理而偷惰者勢難強以相從且事甚瑣煩安得人人而濟至興築以濟要工則修城挑河負糧運炭及一切力作不能時時皆有况工役未有定所編管尤慮難周夫防川者必濬其源療疾者宜固其本今配所逃亡人犯既苦於生計之窮

迫復峻以法令之森嚴是何異以壅塞防川以攻伐療疾其不至潰敗幾希矣揆諸

聖祖

列宗矜恤罪人之本意亦失其平茲經悉心籌畫成法具在未敢妄議更張欲縻其身莫若不令散處欲束其志莫若給以口糧就川省各屬安置人犯計之大處不過二十名中處十五名小處十名每名日給口糧銀三分計大處每日銀六錢中處每日銀四錢五分小處每日銀三錢爲數無多籌款尙易擬飭通省各廳州縣每處於城內設立徒流所一處每犯五名選派妥實看役一名在所常川看管各犯朝出夕歸不准在外散處並令各犯或編草鞋或

織篋席准其售賣仍照例由該典史吏目等專管其事十日往查一次稟報該管廳州縣每月點卯一次當堂散給口糧不經胥役之手免其剋扣禁止勒派紳糧以杜擾累不准動用三費以節公項仍造具月冊徑報院司按季彙報刑部查考如有能執生業之犯聽其自便應給口糧卽由各廳州縣按月捐廉散放其創設徒流所一款應飭現任各廳州縣墊款建置以墊款之多寡定記功之上下總期事不煩而民不擾方可垂諸永久如此一調劑間在畏法者固可從容執業而懶惰者亦可苟且偷安儻復在配脫逃是

朝廷布寬大之恩該犯冥然罔覺嚴懲之不爲過主守之

人亦屬咎無可辭並應將逃犯及主守看役與專管兼管各官照例分別加等治罪議處庶情法兩盡別無窒礙矣查五軍罪犯自邊衛裁撤徒存其名刑部所擬與現在流犯無異輕重倒置酌留極邊四千里及煙瘴充軍二項其餘附近近邊邊遠三層量加刪減之處誠爲核實惟事關數百年舊法可否變通應由刑部彙核辦理非臣與該司一隅之見所敢妄議至新疆能否發遣作何安插亦應由該省酌量核辦以昭周妥所有遵照查明川省地方安置軍流徒罪人犯籌議緣由是否有當除咨部查核外理合恭摺具奏伏乞

皇太后

皇上聖鑒飭部核覆施行謹

奏

慶典議敘謝

恩摺

光緒十年十二月初二日

奏爲恭摺叩謝

天恩仰祈

聖鑒事竊

臣

於光緒十年十一月三十日接吏部咨十月

初一日內閣欽奉

慈禧端佑康頤昭豫莊誠皇太后懿旨本年五旬萬壽疊
沛恩綸四川總督丁寶楨著加恩交部議敘欽此又同日
咨十月十一日欽奉

上諭本年恭逢

皇太后五旬萬壽普天同慶所有王公及京外文武官員
現在議降議罰及前有革職留任降級罰俸之案著加恩

悉予寬免欽此

臣伏讀

天章當卽恭設香案望

闕叩頭謝

恩欽惟

皇太后蕃釐似幄

受祐娥臺慶溢

璇宮歡騰

玉陛

月瑤啟瑞

延齡披益地之圖

樞電呈祥

衍策協昭華之琯合千百國之衢歌巷舞伏地稱觴統億
萬年之長治久安呼嵩獻

壽仰維

皇上邁武承

顏踵虞順

志宥百工之不逮

帝澤覃敷

嘉庶績之咸熙

聖仁廣被

臣

未效涓埃渥霑

雨露翹瞻

北闕喜戴

慈暉効職西陲恆依

福蔭惟有和衷勵翼肅聆

媯陞之笙簧宣力鞠躬稍答

堯天之覆幬所有微臣感激下忱理合敬謹具摺叩謝

天恩伏乞

皇太后

皇上聖鑒謹

奏

行黔鹽釐請仍由川征解摺

光緒十年十二月十六日

奏爲川省代黔征收釐稅擬請仍由川省征解赴黔交收以省周折而資便捷恭摺仰祈

聖鑒事竊

臣

准部咨指撥光緒十一年分甘肅新饟銀四

百五十五萬兩擬指撥四川省銀一百二十萬兩又准咨開四川省每年應協貴州饟五十萬兩內鹽釐應協貴州兵饟六萬兩按糧津貼應協貴州兵饟五萬兩夔巫鹽稅應協貴州兵饟五萬兩改令湖北省於光緒十一年批解銀五十萬兩湖南省批解銀十六萬兩各等因查川省原議協黔之饟每年祇解四十九萬兩並無五十萬之多建議之始蓋以黔邊鹽務局每年應解協黔抵捐銀四萬兩

又准部咨於奏請解京餽內改解黔省銀十二萬六千兩
又行黔鹽引內黔省應收釐稅議明由川省代黔征收釐
稅銀十八萬兩又因司庫頻年奉撥協黔軍餽十三萬四
千四百兩又奉撥茶課鹽釐鹽稅津貼等項銀解供黔省
兵餽銀二十三萬兩統計每年撥銀三十六萬兩司
庫實因撥款日增黔省既有撥解勇餽銀又須指撥常年
兵餽是一省而兵勇兩籌實屬無從設措前撫臣岑毓英
目睹艱窘情形極知其難因與川省議定無論勇餽兵餽
每月解銀一萬二千兩年中共解實銀十四萬四千兩連
黔邊局應解抵捐協餽及代征釐稅等項每歲一切共批
解黔省銀四十九萬兩一併在內今准部咨指爲歲協費

州軍餽銀五十萬兩據文內所稱歷撥兵餽之鹽釐鹽稅津貼等銀十六萬兩並文內未經敘及之每年指撥兵餽茶課銀六七萬兩查川省解黔餽項均卽在原議解黔四十九萬兩之內並未另有多解茲旣將議定解黔之四十九萬兩改歸他省撥解又指出應協黔省兵餽之鹽釐鹽稅津貼等項應行免解而又將兵餽案內向來一同指撥之茶課一款並未提及如提出此款銀兩仍應由川解納則是川省於議定解黔四十九萬兩之外復須多解此款銀六七萬兩似與川省以前解數稍涉參差至原議解黔四十九萬兩之內有黔邊局代黔征收釐稅銀十八萬兩者原因黔省行黔川鹽向因地方瘠苦民鮮殷實從來行

岸各商土著者通行不過二三戶餘皆西商各挾巨貲分布各岸設立鹽號由川購鹽運黔轉發本地小販零星承賣不似他省鹽商均係本境富戶自行開設是以向例黔省額定解部鹽稅僅七千餘兩不便多征實爲體恤商民至意乃黔省向不遵照定制於定稅之外各府州縣無不私設關稅任意自收橫征無度商民疲困日深後值黔省苗教各匪倡亂歷二十餘年延蔓閩省地方全行糜爛戶口逃亡幾盡其時西商遭害者亦十之八九遂各歇業不前黔省鹽務勢已中絕其間因民苦淡食間有零星小戶朋集貲本輾轉購販以圖微利而黔省官吏猶不知稍加體恤仍照未經兵燹以前到處設卡私收商民愈不堪其

苦無所赴懇嗣經

臣

於光緒三年到川查知黔省鹽岸已

廢而川省鹽務弊病又已極深乃毅然更改擬復黔岸創辦官運計初辦之時黔省以各處皆立私稅招商並無一人願至不得已而招西商又皆復畏累裹足不前勢極萬難官運幾於中止因不憚艱苦多方設法經營議以黔省私稅不除商人招必不至因與前黔撫臣岑毓英往返函商議革黔中一切私稅賴岑毓英公忠夙著痛念黔省商民之困已非一日無計可蘇惟有興辦舊有鹽岸可漸爲招集流亡之地乃與臣商定將黔中私稅一概刪除又議以黔中饒項支絀私稅既革則鹽商等一切苦累較輕可以諭令仿照收釐之法略爲征收稍助軍饌臣復與之徧

行示諭各商等知私稅橫征之弊盡除僅與抽釐減累實多情願遵辦乃爲議定四岸共抽釐十八萬兩又恐收釐之後官吏不知悛改復行私設爲害實多且議收鹽釐若必由黔委人易致別滋他弊乃再三商定奏明川鹽抽釐卽由川省官運局員於發商領引時遵照定數一體代爲抽收包解庶商人無可偷漏委員亦無從滋擾自此章定後川鹽行黔始毫無窒礙漸次暢行銷數遂日有起色是川鹽之暢實由於代收鹽釐一層黔省旣得川利卽不能不力爲維持大局今一旦改此黔釐十八萬歸湖北代解無論解款日久未盡可靠卽使源源接濟而黔中待用孔殷緩不濟急且必視爲協饒常款與川省無涉則黔省數

千里引道尙能必其照舊保護乎若地方官稍有漠視雖
川省執法相繩川鹽之行卽難保其不窒且又安能禁其
不似從前私設關卡征收鹽釐無所底止乎川省之官運
本以黔邊爲主而黔中又皆係瘠苦無聊之地值此時事
必須多方體恤然後民情樂於從事不致變更今若此項
鹽釐改歸湖北代解臣早夜熟思實不能不爲黔省計更
不能不爲川省計據臣愚見川省代黔征收係爲杜絕大
弊以歸核實起見並非川省協濟之項如將川省代黔征
收釐項同川省應協黔餉一併改解甘省交收復由楚省
另籌解黔勢必輾轉周折恐黔中緩不濟急據藩司易佩
紳查明詳請奏咨前來臣覆查屬實合無仰懇

天恩俯准勅部再行核議准將川省黔邊局每年代黔征收鹽釐稅銀十八萬兩仍由川省以代征之項陸續解黔其原撥湖北協濟黔省銀五十萬兩只由湖北撥解黔省銀三十二萬兩以符原數餘銀十八萬仍解甘肅交收以抵川省撥解黔省十八萬之款如此一轉移閒甘饗既不至稍有短絀黔饗亦得以隨時濟用川省尤得以永保邊岸一舉而三省均便似可照行除咨部外理合恭摺由驛四百里具奏再現在部撥協甘新饗一百二十萬令於本年解交三成餘歸十一年全解_臣以甘肅需饗甚急而本省庫撥太多實難設措又前奉撥鮑營兩月之饗亦須陸續解濟現值年盡本省各兵勇饗項待領者日集司署勢

不能不分籌支應因與藩司籌議先行撥銀二十四萬兩
由商號於十二月二十二二十三兩日承領匯解甘省交收
以期迅速其餘尙欠解本年一成及明年全數應解之項
均俟十一年內如數籌畫源源撥解不敢稍有延誤理合
一併陳明具奏伏乞

皇太后

皇上聖鑒訓示謹

奏

歲協黔饒請仍由川撥解摺

光緒十一年正月初七日

奏爲黔省瘠苦異常協饒必需按時解至方能有濟額懇
天恩將部中改指川省解黔之五十萬兩仍由川省照解
另將改指解黔之湖南湖北兩省抵解甘饒以期應手而
維全局恭摺仰祈

聖鑒事

臣

去歲准戶部咨議撥甘肅新饒內四川省應

撥解甘饒銀一百二十萬兩其每年應解黔省之五十萬
兩另改指湖北湖南兩省分撥抵解等因當將川省代黔
征收包解之鹽釐十八萬兩係黔省應得之款並非川省
協撥且係爲痛除川黔兩省官商積年痼弊以利行銷關
繫川省鹽運甚重業於十年十二月二十六日將此項代

征釐銀照舊由川代爲征解以免各官商再蹈故轍鹽務始能持久各情形據實奏陳請另行改解在案惟查川省解黔之款尙有川省自認抵捐銀四萬兩又桂部咨川省奏明官運局解京銀內改解銀十二萬六千兩又司道各庫奉撥解黔省兵勇餉銀三十三萬餘兩川省因協撥過多萬難全解與黔議定無論兵勇餉項年中實能解銀十四萬四千兩共合應解黔省銀四十九萬兩自議定後川省每月按解四萬餘兩從無延欠黔省得此鉅款支應一切於今五六年艱窘瘠區幸得稍能整頓者賴有此耳蓋黔省闔境跬步皆山無寸田尺土之腴壤可望生計自國初迄道光末季二百餘年皆仰藉江浙湖北等省歲修

銀兩將就敷衍軍興以後江浙各省協款不至經苗教一行稱亂兵勇俱窮全省五十餘廳州縣無城不破蹂躪殆徧人民死亡百不存一可爲寒心嗣經川楚援兵麇集將上下兩游漸次平定其時黔省供支各項全賴於各省減成收捐藉濟窮乏至光緒四年臣到川開辦官運甫經定局時

朝廷卽有停捐之令臣以捐事議停實爲

國家第一美舉第念黔捐停後來源卽竭無以爲生乃奏請於開辦鹽務征收正款項下認明解部及援解黔省抵捐銀兩復蒙部臣體念黔中極苦情形將川省解部之銀十二萬六千兩一併改歸黔省接濟是大部之於黔省誠

可謂知之最深恤之備至矣今若將此常年得用之款一

併改解甘省而令湖南北分款抵解黔饒在部臣統籌指

撥具有精心而黔中官民一聞此議向臣哀籲羣相驚恐

雖經部中指有抵解省分而無奈黔中毫無生計專靠按

月協款應時必到上下乃有措手茲川省一旦停解改指

他處無論解款未能如數接濟即使能如數接濟而黔中

窮極之後其望饒也若嬰兒之望乳刻不能緩臣屬黔人

知之最悉正擬代爲籌計忽接署撫臣李用清致臣信函

稱其在黔辦理諸事甫有端緒適逢川饒改解之文私心

憂危深虞饒源一或不濟恐有束手無措之勢此誠實在

情形查署撫臣李用清自到黔後公忠自矢力崇儉樸辦

事實心實爲黔省歷任撫臣所罕見今以該省糜爛至深流亡未復之地該撫臣苦心孤詣竭力撐拄通省方冀大有轉機卽臣在川疆辦理黔邊鹽務一切皆深仰其維持之力茲將此項全數改解甘省另撥他省抵解卽臣撫心自揣亦切隱憂萬不得已用特瀝陳下悃仰懇

天恩飭部另議或將川省歷年解黔之銀四十九萬仍按前照數每月分解不少短絀而另將扣抵解黔之湖南湖北兩省照數改撥抵解甘饟如此稍爲轉移則部撥甘饟仍無分毫短絀而黔省得以按月解款勉供支應辦理不至拮据地方亦可望有起色至所指湖南湖北兩省撥解黔饟者卽以之抵解甘省就道里而計該兩省至甘相距

少或十餘日多或二十日亦尙不甚寫遠臣爲無損於甘而有裨於黔起見是否有當謹不揣冒昧由驛五百里據實上陳伏乞

皇太后

皇上聖鑒飭部速議施行謹

奏

降級留任謝

恩摺

光緒十一年正月二十七日

奏爲叩謝

天恩仰祈

聖鑒事竊

臣

於光緒十一年正月初九日接准吏部咨光

緒十年十二月十二日奉

上諭軍機大臣大學士會同刑部定擬已革巡撫唐炯徐
延旭罪名各一摺四川總督丁寶楨以唐炯人才可惜代
爲乞恩且於陳奏摺內臚舉唐炯從前戰蹟尤屬有意鋪
張著交部議處等因欽此經部擬照不應重私罪議以降
三級調用係私罪毋庸查級紀議抵等因光緒十年十二
月十八日具奏奉

上諭著加恩改爲降三級留任欽此欽遵咨行到臣臣祇
奉之下當卽恭設香案望

闕叩頭謝

恩伏念臣承乏蜀疆自慚魯鈍涓埃未報隕越滋虞前此
爲已革巡撫臣唐炯代乞

恩施已屬冒昧又因奏請建黔勇專祠致涉鋪張尤爲不
合荒謬之咎實無可辭乃荷

聖恩曲加寬宥改爲留任

帝德之含宏備至臣心之惶悚實深渥被

溫綸彌殷欽感臣惟有勤加砥礪勉策駑駘冀酬

高厚鴻慈於萬一所有臣感激下忱謹繕摺叩謝

天恩伏乞

皇太后

皇上聖鑒謹

奏

京察議敘謝、恩摺

光緒十一年三月初五日

奏爲恭謝

天恩仰祈

聖鑒事竊

臣

於光緒十一年二月二十九日准吏部咨開

正月二十四日內閣奉

上諭欽奉

慈禧端佑康頤昭豫莊誠皇太后懿旨三載考績爲國家
激揚大典中外滿漢諸臣有能恪恭職守勞勩最著者特
加甄敘以示優眷四川總督丁寶楨久膺疆寄任事實心
著交部議敘欽此伏讀

綸言感殷藎懼自維謏陋渥荷

哀嘉

高深莫贊慚悚難名乃蒙

皇太后

皇上不棄庸愚

特加甄錄值

綜覈吏治之時寸長胥邀

藻鑑際

澄敘官方之盛樛材亦沐

榮施

臣拜

命自

天汗顏無地惟有祇奉

宸謨恪供職守郊圻申畫嚴春冰虎尾之防僚案寅恭懷
赤帝鞠梁之誨鞠躬罔懈於夙夜冀竭駑駘庸翼益効乎
涓埃勉承

鴻訓所有微臣感激下忱理合恭摺叩謝
天恩伏乞

皇太后

皇上聖鑒謹

奏

懇

准乍了入

貢片

光緒十一年三月初五日

再據署射箭鑪同知石光熙管理巴塘糧務周上達稟稱據乍了尼們罕呼圖克圖總堪布洛宗丹增及倉儲巴江彩登達大頭人札喜魯秀澤旺多吉札什饒登舟登達及僧俗眾百姓等呈稱乍了僧俗百姓自康熙年間歸順天朝伺應藏道夫馬東至江卡界西至察木多界共十二站又乍地界連上中下三岩時防夾壩野番出沒又早年尼們罕呼圖克圖會自捐兵費口食奉調隨征廓爾喀及贈對共三次出派民兵一萬四千餘眾會傷亡五千有餘及今計一百八十餘年未敢有誤差徭惟自思巴塘察木多各鄰均得呈請進

貢獨乍了一處未得隨班無可報我

大皇帝之恩叩懇轉稟請奏准其隨同進

貢等情復訊據該頭人等面稱食毛踐土無非

天朝恩德今願隨班進

貢實係出於至誠未便阻其向化之心據情轉稟到

臣臣

查口外各番乍了最爲地廣人強與巴塘察木多德爾格
忒江卡等處壤地環而又素爲三岩野番所憚早年雖有
呼圖克圖名號未及親領號紙咸同以來邊外各番紛紛
滋擾近年勦辦三岩畫分瞻對疆界並訊結麻書孔撒等
鉅案各夷漸就範圍惟綜籌邊圉情形瞻對旣已歸藏乍
了與三岩兩番實未便令其漫無統屬究爲西南邊防一

隔罅隙况值西陲近日外洋每有覬覦之心此等強悍番族縱或不敢倚爲外援亦斷不能置諸不論不僅目前藉禦三岩野番爲以夷制夷之計也上年道員丁士彬遵旨赴藏查辦廓案行抵巴臺卽據該乍了再三呈懇該道溫言拊勉得其輿圖戶冊諭令循舊當差並密稟到臣臣細加察訪無異茲復據該管丞倅轉稟前來察其歸化出於至誠合無仰懇

天恩俯准該番與巴塘察木多各族於例應貢之年一體隨班進

貢俾其百餘年湮抑之忱於邊庭大局實有裨益再該乍了頭人稟稱從前隨征廓番等處曾奉

賞給呼圖克圖號紙及總堪布洛宗丹增大頭人札喜魯
秀虛銜頂戴可否並懇

飭理藩院查明原案

俯准賞給以資撫馭而固邊防爲此附片具陳伏乞

聖鑒訓示謹

奏

英人窺伺後藏豫爲籌備片

光緒十一年四月初三日

再臣現接西藏委員候補通判趙咸中密稟多吉嶺一路夷人蠻子等往來日眾漢人亦復不少聞洋人深爲得計廣行要買接待蠻子尤極殷勤漢人次之有放債與蠻子者有賒貨與蠻子者現在蠻子皆樂於前往又探聞該處鐵路已修過多吉嶺欲直達怕克里而止怕克里卽界後藏地距前藏僅十二站趕行八九日可到竊查洋人用意大非良善不得不密爲稟陳等語查英人之窺伺藏地已非朝夕可慮自在意中况該夷久踞五印度地方與藏地相去不遠現在巴勒布哲孟雄等處亦多歸附該夷中僅隔廓爾喀一隅然亦在依違兩可之間上次該國遣人入

奏和名二十一
貢臣曾經密奏請厚加

賞資該國使臣及其國王以示聯屬又於上年法夷與越南構兵時復奏明該國此時從旁觀望應妨其乘隙而動今該夷鐵路已修過多吉嶺且接待來往番漢人等甚殷是其意懷叵測端倪已露昔年法夷構兵越南其蓄謀早在二十年以前待至一旦蠢動駸駸不可復制是其殷鑒况法夷欲謀踞越南尙未卽遂所欲而其國又遠在數萬里之外彼越國鄙遠中國幾爲所疲今英夷久踞印度印度全境歸附日久其根蒂深固幾與該夷內地無異稍有不測印度至藏瞬息可到而西藏一經有事勢萬不敵必將求援於蜀蜀中亦萬不能坐視且該國如不幸滋事則

與川境固屬毗連卽以各省而論彼由印度行駛輪船已
在南洋之內與粵東江蘇閩浙豫皖楚等省處處順便如
履戶庭固不若法夷之有事定須向該國往返商辦緩不
濟急也臣謂英夷之禍幸而不發則已不幸妄動其害更
甚於法夷而滇蜀必首當其衝今旣接有此稟是該委員
就近在藏探明決非虛語亟應於無形中早爲之備免致
臨事倉卒臣向來作事最忌張皇此事近在切膚曲突徙
薪正在今日臣惟有暗將川省所有防營分起調練勤習
槍礮陣法並精練打靶等事一面密飭機器局將洋藥筆
碼銅帽及快利之洋槍洋礮加工添造以備應用不敢稍
涉怠玩或期思患豫防庶免貽悔將來臣愚昧之見爲此

謹附片密奏再 臣前經片奏請將乍了夷人准令隨班入貢尙未奉到

批示查乍了番夷人極強健其地又屬川藏交界之間該夷因同一夷人久不得隨班進

貢殊切向化 臣查其人尙勁勇若蒙

恩准其入

貢該夷必傾心效順將來遇有事故內可以捍衛川疆外亦可援應西藏卽現在之三岩野番等亦可藉其控制伏懇

天恩俯准飭行不勝感激伏乞

聖鑒訓示謹

奏

奏

奏

越嶲廳添設學額並稟增額數摺

光緒十一年五月初四日

奏爲請增越嶲廳文武學額及稟增額數以復舊制而勵人才恭摺會奏仰祈

聖鑒事竊查越嶲廳舊設學額歲科兩考各取進八名原額稟增各二十名均於乾隆年間先後裁減文武學各二名稟增減去五名改爲三年一貢自裁減以來迄今百有餘年人文日盛夷人亦多習射讀書爭就小試現計闔廳煙戶不下三萬應試者已數百人較前加至十倍今每考仍祇取進六名情有向隅據越嶲廳同知蹇銑稟由藩司具詳請復舊額等情前來臣等查學政全書內載乾隆二十六年議准四川松潘廳越嶲衛等處均屬邊徼地瘠向

學寥寥而取進額數松潘越嶲各八名人少額寬各減二名應俟人文稍盛之日奏請增給其取進武童及廩增額數均照此增減又乾隆二十七年議准四川松潘越嶲原額廩增各二十名二年一貢應減去五名三年一貢各等因覆查該廳從前地廣人稀是以酌量裁減學額嗣因地漸開辟升爲衛廳改守備爲通判復改通判爲同知地雖邊徼而戶口歲有加增漢夷亦多向化應試已數百人每有額滿見遺之歎合無仰懇

天恩俯准將越嶲廳從前裁減之文武學額仍加二名並加廩增五名二年一貢以復舊制而勵人才出自

鴻慈除咨部外謹會同學政臣邵積誠合詞恭摺具奏伏

乞

皇太后

皇上聖鑒飭部議覆施行謹

奏

長子體常

簡河東道謝

恩摺

光緒十一年五月初四日

奏爲叩謝

天恩仰祈

聖鑒事竊

臣於四月二十日得閱二月初一日邸鈔恭悉

臣長子體常奉

旨補授山西河東道聞

命自

天感悚無地當卽望

闕叩頭恭謝

天恩伏念

臣黔陬下士一經乏教子之方蜀土備員七載

少觀橋之訓

臣子體常材庸質陋豈議官箴智淺學疏何

知吏治一麾出守尙未著夫循聲三晉分巡敢冀膺夫
寵命乃渥被

聖慈過叨

恩遇循涯揣分時虞艱大之難勝捫臆銘心永矢忠貞之
世薦臣惟有勛臣子以共勵寅恭慎乃司而無慚清白勉
爲午可婉從令而上答

生成所有復臣感激榮幸下忱理合恭摺具陳叩謝

天恩伏乞

皇太后

皇上聖鑒謹

奏

議覆戶部開源節流各條摺

光緒十一年六月初二日

奏爲遵照部議籌擬開源節流二十四條以裕餽源行令各省查照辦理茲謹將川省現在應辦情形分別敬繕清單恭摺具奏仰祈

聖鑒事查臣於光緒十年十二月二十八日接准部咨法人構難戰事未已目覩時艱敢不同竭愚忱力圖匡濟惟自古理財之道不外開源節流二端今將商擬開源節流各事宜另繕清單恭呈

懿覽一俟

命下由戶部分行中外欽遵照辦限四五箇月一體認真分別舉辦等因准此竊維現在海防緊要餽需浩煩屬在

中外臣工無不同深焦灼在部臣通計全局籌備不憚周詳而臣等責任地方利害尤須兼顧固不敢遷就以敷衍亦不敢鹵莽以生事茲將所議各條會同司道暨府州縣體察時宜反覆商榷查其中有可以從權酌辦者有必應恪遵照行者有事經從前敷實酌辦現在實難以再議者有查明地方事勢不同民情多異難期勉強以從事者相與再三審度盡數月之力悉心辦理並連增辦豬釐合計通省約可得銀三十餘萬兩專備海防要需當此時勢艱窘勉強籌此鉅款實已不遺餘力若必操之過急或致人心疑畏輒行歇業轉費周章殊失政體茲將二十四條中現經酌議增辦及現應照舊遵行並實在難以舉行者分

別敬繕清單恭呈

御覽除咨部查照外謹恭摺具奏伏乞

皇太后

皇上聖鑒訓示謹

奏

謹將奉准部議開源節流各事宜參酌川省情形分款議
覆繕具清單恭呈

御覽

開源十二條

一領引行鹽酌令捐輸一條部議飭照兩淮票商章程以
五百引爲一票按年收捐等因查川省鹽務現分官商兩
運商運行銷本省腹地計岸兼行濟楚而究以楚岸爲大
宗前因規復淮綱分岸減引行銷已不大暢而楚岸抽釐
甚重每引計抽錢一百八十串近因辦理海防湖北江南
又每引加抽釐錢五十串商力益疲且資本微薄商力遠
遜於淮官運專行邊岸而滇黔兩省皆久經殘破之區人

民未復售銷極難且運道盡係旱路腳力甚貴銷路更不及淮十分之三四現經開辦邊岸稍爲得手繳本開號規模漸定歷屆七綱雖引岸狹窄尙能勉及奏銷自未便改招票商致滋紛擾轉生疑懼前經翰林院侍讀龍湛霖奏奉

上諭行令妥籌辦理已將川省官商兩運礙難行票實在情形據實覆奏在案今奉飭議復加確察川省鹽務商情萬不能仿照兩淮行票應請仍照川省現在定章辦理一整頓嵯務一條部議飭照原額加成抽收等因查川省鹽務井竈引商半多租給他人承辦額定課稅礙難議增至所收鹽釐爲時旣久章程屢更光緒三年整飭鹽綱改

包疏引恪遵道光三十年定章每張水引配鹽五十包陸引配鹽四包每包巴鹽一百六十觔花鹽二百觔不准稍有加增應收釐銀富榮棧樂四廠皆查明地方商情酌定每引巴鹽收銀十七兩花鹽收銀十八兩潼屬各廠本重銷滯每引收釐銀七兩五錢皆係就廠抽收商人配鹽出廠經過重慶由委員驗收濟楚鹽釐每引巴鹽收釐銀十九兩五錢花鹽收釐銀二十五兩其餘邊計各引運費極重行銷甚絀無論花巴每引只收釐銀二兩名曰渝釐其餘歸丁州縣計岸均係地方貧民分赴各廠購買配贖引鹽分運銷售委員就廠計勛抽收每觔巴鹽四文花鹽三文謂之票釐所辦情形各有不同皆係因地制宜斟酌辦

理今奉飭議加收復詳加查覈濟楚引鹽現在銷路既窄
領引又減統計行楚一引原幫淮課舊定楚釐以及楚省
江防江南加抽每引花鹽兩省已抽釐錢二百三十千再
加以川省渝釐廠釐銀錢併計共合釐銀二百餘兩揆諸
商情委難再加其滇黔邊岸民多未復又道遠費重湖北
八州縣計岸已經淮鄂加抽均未便再行議加惟有於本
省計岸引鹽不論商運官運及歸丁州縣票鹽每觔照山
東一文加價辦法酌量加收釐錢一文引鹽責成經征州
縣票鹽卽歸各局委員分別加收於正稅正釐之外分提
另解專供海防軍需或定以一二年爲限先行試辦海防
平靖卽請停止以紓商力統計全年本省計岸及歸丁州

縣額引共折水引二萬二千八百五十六張零計應行鹽二十二千八百五十六萬餘觔每觔一文計可收錢二十萬串所行票鹽均照歸丁額引計觔併算在內應免再計一就出茶處所征收茶課一條部議飭照甘肅甯夏等處設局給照加收等因查川省茶質最粗價值極賤並無出洋茶觔額定邊土腹三項茶引十三萬餘張每引配茶百觔腹引行銷內地邊土各引分由松潘廳打箭鎗兩路行銷藏衛番地課稅羨截每引自五錢八分八釐起至九錢二釐不等早年藏路不通番地滋事積欠稅羨多至四十餘萬近雖連年整飭嚴催彌補積欠一時難清欠數仍屬不少是願課且覺不遑何能再加再四籌思惟有試辦茶

票之法擬請於向來銷引較易不甚欠課地方酌量情形發給茶票照引課銀數收取票息計尙可得銀一萬五六千兩專供海防軍需撤防之日仍請卽行停止

一推廣洋藥捐輸一條部議行令不分洋藥土藥發給華商行坐部票按票捐銀等因查川省僻處西陲並非沿海口岸向無洋商行運卽華商首運離口之時應給行商部票固非川省所能籌辦至洋藥一經離口散漫難稽私帶私販在所必有川省旣無大幫華商盈箱整包販運入川亦無富商大賈坐設行棧所有別項客販自滬漢零星夾帶而來沿途輾轉售賣事無承總勢難稽查若欲徧地杜防更屬得不償失是給發華商坐票亦屬難以照行卽如

川省前此奉文征收洋藥釐金無從遵辦不得已派諸各州縣隨糧征納勉敷部定銀數歷時不久因事極窒礙難行旋於同治十一年經人奏參遂行停止此其明證又夔州關稅向本設有征收洋藥一項而歷查從前收數均屬無幾細查實情來往販運果屬寥寥尙非經征不力至川省所產土藥本屬有限加以年來禁種罌粟出產愈少故向無坐商坐店以及行銷定地實無從責領部票按票捐銀勢難照辦

一推廣沙田牙帖捐輸一條部議飭照廣東江蘇等省辦理等因查川省不近海岸向無沙田沿江間有蘆洲亦隨驗隨墾與廣東江蘇情形迥不相同至牙帖一項川省歷

無捐款亦從未抽收牙釐與陝鄂等省情形亦異查川省現在承領牙帖開設之店鋪僅四百一十五張每張定例歲納課銀一兩至三兩不等本小利微徒資餬口凡各衙門均無陋規近復貨物鮮通商賈停滯以前牙行動致虧折招募無人若就現領之帖四百餘張卽責令均按照下等每張捐銀五十兩該商民等聞之輒相驚駭查看情勢萬難遵行而上中兩等更無論矣再四籌商實屬難以勸辦

一煙酒行店入資給帖一條部議飭照牙帖辦法頒給部帖覈其成本大小明定科則按年交納課銀一次等因查川省所產葉煙僅止什加溫江郫縣數處農人各以本年

自種田畝栽植收成後自行肩挑赴各市行銷出貨本屬不多間有零售鋪戶均係向種戶自行價買並無一定行市獲利亦薄向無行棧囤積歷來歸入本地土貨抽釐收數頗屬無幾勢不能定則交課至市肆所售之酒川省向無著名酒行如浙江之紹酒山西之汾酒等項通行天下利息甚厚川省概係旋釀旋賣僅供本地沽飲卽重慶所有渝酒行銷多而資本亦屬無多若責令納課亦覺紛擾苦累然既有所出亦應查照辦理現已飭川東道就近體察情形或爲酌抽釐金之計應俟勸辦能有成效再行覈定收數多寡另案辦理

一匯兌號商人資給帖一條部議飭令查明殷實富商責

具連環保結承領部帖方准匯兌每年令納課銀六百兩等因查川省開設匯兌票號祇有天成亨協同慶蔚豐厚協和信新泰厚元豐玖百川通日昇昌蔚泰厚等九家均由山西平遙介休等縣承領東本來川開設店號川省因近年報解京饒及各省協撥等款甚多以道路遠近不一又值各省多事委解頗難皆令該九號承認分領匯兌以期省便此外該號貿易之多少有無並不得知現飭成都府督同成華兩縣飭傳開導諭令遵辦該商等咸稱上年山西大災之後東號出本漸次收小兼之近年生意蕭條易放難收各處均係勉力支持萬無餘力繳茲鉅款以領部票且本號各有東家卽須辦理亦必責之號東乃可承

辦等語查該商等均係領本貿易並非自擁厚資京都山西尙有坐號該商不能自主自係實情似須由坐號如何設法辦理庶期集事未便勉強認辦徒託空言

一劃定各項減平減成一條部議飭將練勇餉及一切雜項均照湘平每兩扣銀四分之數一律扣平支放其折合洋銀錢數亦宜明定章程等因查川省支放各款並無折合洋銀及折放錢文之項其司庫常例支銷各款歷有扣減定章前於道光二十三年減扣二兩平咸豐四年搭放官票八年十一年又陸續添扣六分平及應覈減二成各款均經分晰造冊咨部有案至勇餉一項從前係照楚軍章程每名月支庫平銀五兩六錢八分光緒三年以後大

加覈減勇數既裁口糧又減每勇僅月支銀三兩一錢較之原定楚章已減十分之四有零且川省人民極衆米糧柴炭無不增昂各勇所得口分亦僅勉強自給若再每兩扣銀四分必致不敷口食再四籌酌應請仍照舊章支發俾免短缺枵腹從事至司庫一切放款前已遵照舊章辦理其應扣減成減平各數目容卽逐一清查造冊報部查覈

一嚴提交代征存未解銀兩並嚴定交代限期一條部議飭將交代案內征存未解銀兩分年分款分任逐一開具清單咨報戶部一面勒限解清交代冊結送部不准逾二參之限等因查川省歲征錢糧較少歷係年清年款從無

拖欠分毫及遲留不解之弊近日撥款愈多催餽甚急錢糧解款按月均委員摧提不容片刻延緩間有欠解均係隨時查明奏參勒追有案現復嚴飭各屬隨征隨解遇有前任征存未解各款卽由後任接收批解不准存留亦不准造報違逾交代例限有則嚴參

一嚴催虧空應繳應賠各款一條部議飭將追賠關稅查明因公虧短及事非因公各案分別勒繳等因查川省短征關稅之案有袁祖惠葛之鏞宋恆山徐期匡數起實因商貨稀少征不如額查覈尙無侵虧情弊迭經嚴飭賠繳尙未報完有項而各該員多已病故現在分別行查有無子孫可賠照例辦理

一入官產業勒限變價解部一條部議飭令查明地畝房
閒應令招佃議租者一律出示定價招買勒限半年變價
解部等因查川省入官田產本屬無多歷奉查鈔咨追各
案有早經變價解司者亦有尙未變出報解者現經逐一
詳查另行覈辦

一酌提漕糧漕規鹽務鹽規餘款一條部議以湖南巡撫
龐際雲奏該省鹽務緝私經費可以移作軍需又山東漕
糧應解部庫扣存經費積至二三十萬餘兩如有似此經
費可以移緩就急者奏明辦理等因查川省並無漕務鹽
務事件歷來經征課稅羨截向由各州縣照額征齊自行
傾銷備文派書親齎道庫限同庫大使用部頒砵碼兌收

隨時印給批迴所收鹽釐亦由該管局員恪遵奏定章程轉解道庫收納均無私毫浮收從前稍有款目不清自光緒三年奉文設局澈底一體清釐俱已詳明更正道署委無收存別項規費可以提撥

節流十二條

一裁減釐局經費一條部議飭令各省將釐局經費分別裁汰等因查川省山路崎嶇灘河險阻商賈貿遷不易抽收釐數向不及江浙湖北之多加以近年滬漢商販因海防江防有事陸路行商入川既少水路船隻又被洋票侵占過半較之東南各省盈絀懸殊是以釐局經費向章僅扣一成支給各費自光緒三年以後又復大加裁減力杜

虛糜川省多係旱道地方遼闊繞越路多省局勢難遙制
必須設局委員分頭辦理方克有濟惟祇此一成經費藉
資辦公實難再行裁減復詳細酌覈係屬實情未便強辦
致委員等賠累

一裁減各關經費一條部議飭將從前留支太多之關查
提歸款備撥等因查川省成都夔州甯遠敘永雅安廣元
各府廳縣均有經管關稅例支書巡飯食筆墨紙張等項
數目多寡不等此係在所必需無可裁減應請照舊辦理
惟夔州府雅安縣兩關尙有可以酌裁之款現經詳細查
明夔州關自臣署向來原定之辦公經費一萬二千兩丁
役等工食銀一千二百兩經臣前次奏明應歸本省地方

隨時籌辦夏季施送藥材及冬季賑撫各貧民衣食並地方應辦之修理河道橋梁及一應公事之不能動用公項各事卽於此項內撥用歸於藩司及成都府經理支用外現擬籌減銀四千四百兩餘仍請留於本省地方以應隨時必需費用免致動卽掣肘此外所有向章津貼各署及各地方一切公費亦經覈實裁減銀三千七百兩共裁減銀八千一百兩其雅安關稅向亦有幫貼該道府等辦公經費各款茲亦詳加查覈亦可酌減銀一千五六百兩合共兩關酌裁銀九千數百兩以供海防經費其餘敘永甯遠等關向係爲稽查來往偷漏而設征收實屬無多厯無他項浮費無可裁減應行免議

一覈定各省局員額數銀數一條部議飭將局卡裁併酌定員數覈定薪水實力整頓據實奏咨等因查川省設立各項總局業經節次裁併報部有案現在實無冗設之員其支給薪水原係辦公之用以後能否再加裁併酌減應飭司道隨時會同各局分別能否照辦確覈酌議另案辦理

一隨營文武分別裁汰及酌定額數銀數一條部議飭照河南省辦法無論統帶營數多寡概不准開報隨員薪水以杜濫支等因查川省歷辦軍需報銷案內均係先將各營員弁銜名勇數造冊咨達隨後造報支款由部覈銷本不准以閒冗充數濫支現在留防各軍所有文武隨員近

因庫儲支絀均令一律裁撤閒有收留在營預備各營營哨各官閒有事故及緊要差事必須派委當差之官弁前往查辦此等勢難一概裁汰者均係各該營自行捐給薪水司庫並不動用分釐公項應毋庸再行酌定

一酌減內地各省防軍口糧一條部議飭將腹地防軍不能遽裁者仿照綠營兵餉量加撙節等因查川省十數年征防各營勇數多至五萬餘人口糧無分征防悉照楚軍章程支給嗣經歷次裁汰營頭勇丁亦分別酌減口糧光緒三年以後復將前定勇餉大加覈減每勇僅月給銀三兩一錢川省土勇月僅支銀二兩四錢比前實減四分及五分有餘此時無可再減後又於每營五百人之數酌裁

五十名僅以四百五十人爲一營更屬減之又減查川省幅員遼闊而四面皆逼處番地從前每年義馬雷越各邊地無年不有夷匪出巢滋擾每次派撥兵勇防勦或費十數萬或八九萬庫款不等近三年中始稍安靖所省實多而內地之匪徒復不時竊發滋事現僅留勇萬餘人到處分布雖名防勇調派刻無虛日且日勤操練以備征調非綠營兵丁駐守塘汛可比實難再爲撙節應請照舊辦理一酌減內地防軍長夫一條部議飭將各省防軍每營五百人祇准用長夫一百名不及一營者卽按此數推算自光緒十一年爲始一律照辦等因查川省勇營每營五百名用長夫二百五十名照東勇章程每名日支銀八分現

在防勇已節次裁減僅存勇丁一萬一千餘名勇餉亦遞相覈減較之從前舊章已減四五成矣此項長夫如能再裁亦應遵照酌減以節餼需惟揆度川省情形勢有不能酌減者其故有三緣川省跬步皆山鳥道蠶叢甲於他省且防軍各營並非安坐無事駐定一處移紮已屬無常又須不時調遣一遇拔隊開差川省路遠動輒四五百里或竟千餘里搬運軍裝輜重每夫只堪背負五六十觔崎嶇繞越日行亦止五六十里不比河南山東有車輛可及川省十餘人之用此人數之不能減少一也長夫每日僅支口糧銀八分設或人夫不足臨時雇募民夫應照民價支給每名每站非給腳價銀二錢數分不甘受雇此又覈算

銀數之欲節轉糜二也勇營長夫各有姓名住址按籍可稽遠道隨行各遵約束無虞脫逃拋棄設以軍事緊要倉卒雇夫而軍旅與行旅不同川省游民混雜良莠難分偷竊脫逃之弊尙淺通賊內應之患尤重此又各營非用長夫不可三也以此而論勢實不能再減致令欲省益費應請照舊辦理

一防軍有營房者不准再領帳棚折價一條部議飭將修築營房之處嚴行查覈加意撙節毋得率請更換等因查川省留防各軍時時調派無一定駐紮之所並未設有營房不能不給帳棚且川省地氣陰溼風霜較大亦不能不按期更換向來各營帳棚係照軍需則例每頂住宿四名

光緒四年更章改爲每頂住宿五名現擬加倍撙節改爲每頂住宿十名卽以光緒十一年各營更換帳棚爲始一律覈減支發是雖無減領之名而減領實較他省爲多矣一覈定內地各省兵勇餉數一條部議飭將制兵空額及老弱之兵認真裁汰並將各路防戰營勇現有人數餉數分別奏報其綠營制兵酌定兵數餉數立案等因查川省僻處邊陲壤地寬遠定制綠營兵額共有三萬三千餘名分隸各標營汛駐紮操防卽一百餘州縣城守塘汛亦在在需兵又加以年中派撥西藏駐防並須於此內挑出差遣僅敷分撥當此軍需緊急庫藏支絀之時自應力籌撙節以資挹注茲擬將綠營制兵不論馬步戰守統行酌裁

一成在汛防尙不至竭蹶而兵餼藉可資節省此項約可裁省銀六七萬兩藉濟海防至川省制兵裁減一成後應歲需餼銀若干及現存營勇需餼若干數目容另案造冊辦理

一確估各項軍餼按年指撥一條部議飭將各省練餼勇餼分造估冊按實在應支數目一併請撥等因查川省常年旗綠各營官兵俸餼向係由司照例預爲造冊估撥至防勇口糧及軍火軍裝等項歷於本省津捐釐金款內隨時酌撥支給一面將籌撥款內銀數專案奏報歸於報銷案內列款支銷近年收解日絀協撥日多遇有急需東挪西應縱有撥定防餼亦難專款存儲如上年鮑軍需餼孔

急卽奉撥制兵額餼以及屯防經費亦復挪移暫用尙未籌還卽其明證若於撥定之後仍復彼此牽扯徒有指撥之名於事何濟然不牽扯動用則出款多於收數又無從以濟急且川省每年收支款數已經分晰造冊有案庫項之盈虛撥款之多寡部中自有稽考應請照前仍由川省隨時籌款奏明撥用免其預計造冊請撥致多煩瀆

一停止不急工程一條部議以海防籌餼緊要其興修一切尋常工程應支庫項者概行停止三年等因查川省近年以來庫藏羅掘一空緊要軍餼尙無法支撥安有餘款以資工用凡有各項工程早經一律停止並未動項請修一各項欠發勒限清釐各項預支分別覈辦一條部議飭

將補還舊欠及每年必須預發之款分別造冊咨報等因查川省度支向本入不敷出從前須待鄰省協濟軍興以後不惟協饒不至而由川省協濟各省以及各路軍營者愈出愈多所賴以周轉者惟在津貼捐輸釐金三項綜計每年一切收款共約四百餘萬每年支發則需五百餘萬實屬入不敷出是以指協各省營之款亦未能按年解足常有拖欠而本年入款已經支發無餘至次年入款又須供本年支用以致補還無期此等款項容卽造冊送部查覈分別停發至預支之項除時憲書而外尙有採銅供鑄價腳銀兩向係先支後銷誠以採買銅觔多寡不能一定腳價亦遠近久暫不一不能不隨時酌辦事後造報然皆

歷有定例無虞滋弊勢難報部覆准再行開支應請照舊辦理

一另定各省起運存留一條部議飭將經征錢糧實支應留數目通查更定等因查川省征收地丁銀內向有留支養廉役食等項近因節次扣平搭票減成各州縣承辦書吏均未能一一扣清以致往返行查多煩案牘現經通飭各廳州縣將經征之款全數起運解司由司分別劃扣減平等項再將應留之款發給承領從無留多用少之弊

查明川庫收支數目摺

光緒十一年六月十六日

奏爲遵

旨查明川庫收支實在數目逐款分晰開單恭摺由驛具
奏仰祈

聖鑒事竊查光緒十一年五月十九日准軍機大臣字寄
奉

上諭現在海防善後用項浩繁必須通盤籌畫覈實經理
方足以裕度支而紓國用各該省關每年所入之款究竟
實有若干其常年例需及現在添支防勇局卡餉需薪水
各款實在費用若干此後常年可以裁減歸併節省之款
若干著切實覈計逐款分晰開單限於奉旨一月內詳細

奏報母得稍涉含混藉詞延緩等因欽此遵卽轉行欽遵辦理去後茲據布政使易佩紳詳遵查川省司道各庫每年額征地丁火耗田房雜稅鹽茶稅羨共銀一百二十八萬五千四百餘兩又收各項支款內應扣截曠及減平減成並鑄錢易銀四十一萬餘兩又收津貼捐輸釐金銀二百五十三四萬兩又收滇黔鹽務局經征稅羨截釐銀七十二萬兩又代黔征收稅釐銀一十八萬兩總計每歲共收銀五百一十三萬餘兩司庫每年應支旗綠各營官兵俸饟文職俸廉役食並臺費屯防一切雜款銀一百八十八萬二千餘兩又籌餉局歲需留防兵勇口糧及鍋帳藥鉛等項銀七十萬兩機器局歲需製造工料銀六七萬

兩統計本省歲支銀二百六十五萬二千餘兩又司道兩庫每歲奉撥京外協饒銀三百七萬七千餘兩滇黔鹽務局奉撥滇黔協饒抵捐西藏臺費運鉛腳價並應解代黔征收稅釐共銀六十四萬九千餘兩共應撥京外饒銀三百七十二萬六千餘兩連本省支款一併覈計每歲共需銀六百三十六萬八千餘兩以前項收款五百一十三萬餘兩計之實不敷銀一百二十三萬餘兩皆於各項應發款內通融騰挪以顧急需隨後籌款彌補歸還此川省收支各款之實在數目也值此邊防多事需用浩繁但有生財之道節省之方敢不盡力圖維無如川省連年勸辦津捐民力已異常竭歷開源節流之道久已搜索無遺每歲

例支之款悉皆一再扣減支發亦無可再行裁減歸併之
項現復於無可籌措之中極力經營飭令通省各營停募
一成馬戰守兵裁減各關經費各營帳棚以及試辦鹽釐
茶票並抽收豬釐計每歲約可節省及增收銀三十餘萬
之譜此外應支各款一時實屬無可撙節分晰開單詳請
具奏前來臣覆查川庫收支各款入不敷出早經分晰造
報有案除現議停募一成制兵裁減各關經費以及各營
帳棚而外其常年例需及防勇局卡餉需薪水各款實無
可再行裁併均係實在情形除咨部外理合照繕清單由
驛四百里恭呈

御覽伏乞

皇太后

皇上聖鑒訓示再川省代黔征收稅釐一項並非川省收款因前議改解甘黔協饒案內具報有案是以仍列收支款內以備稽覈又此次查明覆奏係在奉文一月限內合併聲明謹

奏

謹將川省每年收支各款數目開具清單恭呈

御覽

一收每年經征地丁銀六十六萬九千一百三十一兩六錢六分八釐七毫

一收每年經征地丁內加一五火耗銀一十萬一百六兩八錢六分一釐五毫三絲五忽

一收每年田房稅契銀八萬六千一百七十七兩八錢五分八釐

一收夔關涪口每年應征雜稅銀一十八萬三千餘兩除宜漢兩關劃抵外約征銀一十二萬兩

一收渝關每歲木稅及兌出積總平餘銀五千一百五兩

八錢五分九釐

一收成都甯遠敘永雅安廣元閬中等州縣每年經征雜稅銀二萬三千餘兩

一收打箭鑪關每年經征雜稅茶稅等項兌支阜和等營兵餉及雜款銀二萬餘兩

一收各屬每年經征魚牙當碾等課並鐵稅變價銀三千三百兩

一收打箭鑪廳及建昌松潘等營每年應征各土司番民認納夷賦及雜糧貝母折征兌支兵餉銀四千三百二十二兩三錢七分八釐

一收甯遠府會理州每年經征西流甲豹等廠水銀乾銅

課並白銅青礦課銀二千九百餘兩

一收每年防邊生息不敷應收各官公捐籌備經費銀一萬兩

一收鹽茶道每年額征鹽課稅除撥歸官運局外實征銀七萬三千六十五兩三錢五分七釐二毫

一收鹽茶道每年額征茶引課稅銀七萬一千八百三十一兩二錢九分

一收鹽茶道應解每年鹽茶羨截紙硃脚力除鹽務撥歸官運局征收外實征銀九萬六千四百七十七兩八錢九分三釐二毫

一收寶川局舊鑪制錢每年搭放文職養廉銀及役食約

易回銀三萬餘兩

一收寶川局舊鑪賞番大錢搭放各款每年約易回銀一萬二三千兩

一收寶川局賞番項下鼓鑄餘息並滿營馬廠地租每年撥供武職養廉銀一萬四百七十六兩五錢

一收每年兵馬建曠及兵餼搭錢易回銀兩歸入建曠支銷銀十一萬餘兩

一收朋馬支贍每年約收銀一萬餘兩

一收每年武職養廉減成銀二千五百餘兩

一收每年文職養廉減成截曠銀四萬一二千兩

一收每年廩生餼糧文職俸薪截曠暨文武降住罰俸共

約收銀七八千兩

一收驛站夫馬餽糶夫價每年支贍銀五千餘兩

一收每年支發各款內扣收二兩平銀三萬三四千兩

一收每年支發各款內扣收添扣六分平及減成銀五萬

二三千兩

一收每年支發各款內扣收折放官票覈減銀三萬五六千兩

一收每年支發武職俸餼等項內約收免搭官票減扣六分平銀六萬餘兩

一收每年按糧津貼除免征外約收銀五十八九萬兩

一收每年通省捐輸除解費外約收銀九十萬兩零

一收鹽茶道每年抽收鹽釐銀四十一二萬兩

一收川東道每年抽收鹽釐銀一十六七萬兩

一收各釐局每年抽收貨釐銀四十四五萬兩

一收黔滇鹽務局每年約收稅羨截釐銀七十二三萬兩

一收黔滇鹽務局每年代黔征稅釐銀十八萬兩

總計司道兩庫並滇黔鹽務局共收地丁稅羨及一切雜

款暨減成減平津捐釐金銀五百一十三萬餘兩

計開現籌節省及創辦各款

一自光緒十一年夏季起停募通省各營一成馬戰守兵
每歲節省饟乾米折銀六萬八千餘兩

一裁減留防各營一半帳棚每歲節省工料等銀一萬八

千餘兩

一飭各屬抽收豬釐現甫籌辦尙無成效約計每歲可收錢十萬餘串

一裁減各關經費每歲節省銀九千五六百兩

一試辦加收鹽釐每觔一文計每歲可收錢二十萬餘串
一試辦茶票照引課銀數收取票息計每歲可收銀一萬五六千兩

以上六款每歲約可節省及增收銀三十餘萬兩

一支通省文職各官每年俸薪銀二萬七千二百七十八兩八錢九分六釐

一支每年文職衙門衙役民壯禁吏捕件倉夫斗級工食

銀八萬九千六百五兩八錢八分六釐

一支文武兩廟祭祀廩生餼糧孤貧口糧銀二萬九百三十二兩三錢三分

一支每年驛站鋪司救生船渡夫工食餼鞘夫價銀四萬四千七百四十八兩九錢三分二釐八毫

一支每年甯遠府收買耗銅變價並榮經石砧等廳縣銅鉛腳價約需銀三百餘兩

一支每年旗綠各營兵丁白事約需銀五千數百兩

一支每年夔鑪二關管關養廉書巡工食等項銀二千四百八十一兩九錢七分

一支每年達賴喇嘛徒弟茶葉腳價泰甯喇嘛及解銀兵

丁口糧賞需打箭鑪廳譯字口食裏塘土司口糧等項由打箭鑪廳雜稅內就近兌支銀六千五百四十七兩三錢七分四釐七毫六絲二忽五微

一支每年鼓鑄錢文採買銅鉛腳價約需銀十一二萬兩
一支每年前後藏巴裏察拉打箭鑪廳等處需用臺費並支換防官兵行裝駝馬等項銀十四五萬兩

一支每年屯防經費銀一萬三四千兩

一支文職各官養廉銀一十九萬五千二百二十兩

一支督署將軍都統各衙門雜役工食心紅紙張滿城倉夫加增養廉餼鞘搬駭等項每年約需銀一千九百餘兩
一支每年鹽茶奏銷內除文武養廉外應支奏銷飯食祭

祀賞需哨船工食囚糧衣袴故兵月米等項銀五萬六千餘兩

一支每年成都滿洲營官俸兵饟米折馬乾等項動支奉撥兵饟銀一十七萬七千七百餘兩

一支每年通省綠營武職員弁俸薪蔬燭兵丁饟乾米折等項動支奉撥兵饟銀七十三萬九千餘兩

一支每年通省各營應支公費動支奉撥公費銀三萬四千八百三兩八分

一支每年將軍公費滿營孀婦告退甲兵養膳綠營署事及候補員弁世職俸銀屯兵殘廢兵月饟麻書角洛二汛官兵鹽菜昭忠祠祭品動支兵饟建曠銀七萬餘兩

一支每年各營買補倒馬價值及解部朋馬奏銷飯食約支朋馬銀入千餘兩

一支每年通省綠營武職員弁養廉銀八萬四千六百五十六兩

一支每年各營防邊練勇饟米公費白事藥鉛銀三萬二千餘兩

一支每年維懋等營屯兵養膳屯弁世俸江卡土兵麪茶羊折麻書角洛二汛兵丁鹽菜等項銀三千四百餘兩

一支考取武職月課獎賞每年約支銀七八千兩

一支靖遠營新兵每年守饟米折銀一千五百餘兩

一支籌饟局每年應支留防各營官弁勇丁糧饟並藥鉛

帳棚一切雜支銀七十萬兩零

一支機器局每年應用工料銀六七萬兩

一京饗每年兩次共指撥銀四十八萬兩

一東北邊防經費每年指撥銀二十三萬兩

一固本兵饗每年指撥銀六萬兩

一解京存儲備荒經費每年應撥銀一萬二千兩

一雲南協饗原撥每年銀一十五萬六千兩

一雲南協饗新奉指撥每年銀一十二萬兩

一廣西協饗尙欠奉撥銀三萬兩

一貴州協饗每年由司籌解銀一十四萬四千兩

一甘肅新饗每年奉撥銀七十九萬兩

一鮑超勇丁月需饗銀八萬七千九百五十四兩每年約需銀一百五萬五千四百四十八兩

一滇黔鹽務局每年應解貴州協饗抵捐及代黔征收釐稅銀三十四萬六千兩

一滇黔鹽務局每年應解滇省協饗抵捐銀八萬五千兩

一滇黔鹽務局每年應解協濟滇邊防饗銀二十萬兩

一滇黔鹽務局每年應解駐藏大臣公費銀一萬二千兩

一滇黔鹽務局每年應解京鉛運腳每批銀六千三百餘

兩

總計川省司道兩庫及籌饗機器滇黔鹽務等局每歲共需本省支款及奉撥京外各饗銀六百三十六萬八千餘

兩

明儒來知德請從祀兩廡摺

光緒十一年七月初四日

奏爲請將故儒從祀

文廟以彰聖學恭摺仰祈

聖鑒事竊據前署布政使如山轉據梁山縣知縣鄒放詳
准教諭張仕文牒稱伏查前明故儒來知德生於嘉靖乙
酉年幼有至性鄉里稱爲孝童以禮經中嘉靖壬子科舉
人三試禮闈不第聞親抱病決計歸養迨二親繼歿廬墓
六年服闋後終身布衣疏食不見有司其家產則盡讓於
兄友愛極至尤篤志好學專講大學致知格物之功窮研
經史所著日錄分內外兩篇共計十餘種皆振興正學維
持名教而其著述極深微者則尤在周易集注一書嘗有

思至十數夜不能成寐者一日忽讀見豕負塗之句遂深思有得頓悟易象又悟文王序卦孔子雜卦之意後閱數年始悟卦變之非蓋積二十九年之久而書始成其宗旨以伏羲圓圖爲錯以文王序卦爲綜以錯綜二字極易象之變發千古之祕四聖之所欲言者卒不外乎此萬曆三十年經四川總督王象乾貴州巡撫郭子章舉薦授翰林院待詔因老力辭仍飭有司月給米三石終其身三十一年該儒旣歿三十五年奉旨建設石坊三十六年入祀鄉賢祠崇禎十六年巡按劉之勃題請從祀予諡京師戒嚴未及議行伏讀

欽定明史已將該儒列入儒林傳所著易注收入四庫是

該儒之著作早邀

朝廷洞鑒矣竊思該儒研窮易理專注易象闡發河洛之
奧旨遙承羲孔之淵源揆之

功令實與咸豐十年部議相符應請從祀

廟廷等情請具奏前來

臣

覆查該故儒來知德躬持名教

學究天人當其矢志養親時卽大書願學孔子四字縛於
臂是其銳志聖賢已可概見所著日錄大致謂大學一書
歸本格物致知而其間所發各議於聖門體道功夫實能
推闡盡致至其羽翼聖經師表後學者則莫如周易集注
一編周易自有明以前諸儒皆以象失其傳不言易象止
言其理究之象不著明則理亦無所附麗遂使四聖微言

秘旨幾於塵封該儒乃殫精研思注明易象隱萬縣求溪
山中晝夜刻苦越二十餘年而始悟洵足以啟迪後來默
契前聖允宜祔饗

廟廷以彰異數查該儒在前明時僅得入祀鄉賢並於學
宮旁修建特祠至從祀之請雖經劉之勃剴切疏陳而時
屆鼎革未及議禮是發微闡幽之典實有待於我
朝矣伏考該故儒事蹟

欽定明史已載儒林傳並將其所著易注收入四庫全
書且恭讀

御纂周易折中其說兼採

御纂周易述義其旨多符是該儒學術精粹久在

聖明特賞之中而祔饗鉅典尙復闕如合無仰懇

天恩俯准飭部核議來知德從祀兩廡以表遺德而彰聖
學出自

鴻慈除咨部外理合恭摺具奏伏乞

皇太后

皇上聖鑒訓示謹

奏